

Vischnaunca da Mustér

Regulativ da fatschentas

2014

- A. Determinaziuns generalas**
- Art. 1 Camp d'applicaziun
2 Dretg subsidiar
3 Recusaziun
4 Votaziuns
5 Elecziuns
6 Protocol ed informaziun
- B. Radunonzas d'informaziun**
- 7 Radunonzas d'informaziun
8 Convocaziun
9 Decisiuns
10 Votaziuns
- C. Cussegl da vischnaunca**
- I. Constituziun**
- 11 Seduta constitutiva
12 Saramentaziun
13 Temps d'uffeci
14 Vicepresident communal e cumissiuns
- II. Sedutas**
- 15 Convocaziun e tractandas
16 Sedutas extraordinarias
17 Invitaziun
18 Dretg d'informaziun
19 Participaziun
20 Cumpetenzza da decider
21 Predeliberaziun
- III. Tractaziuns**
- 22 Presidi
23 Biro
24 Cumissiuns predeliberontas
25 Participaziun da persunas dil fatg
26 Presentaziun dallas posiziuns
27 Debatta d'entrada
28 Deliberaziun en detagl
29 Plaid final
30 Objectivada
31 Propostas davart igl uorden
32 Proposta da serrar la discussiun
33 Propostas da revegnir
34 Reponderaziun
35 Secunda lecziun
36 Access public allas deliberaziuns
- IV. Votaziuns**
- 37 Disposiziuns
38 Successiun dallas propostas
39 Propostas cumbinadas
- V. Intervenziuns parlamentaras**
- 40 Principi
41 Moziun
42 Postulat
43 Interpellaziun
44 Ura da damondas
45 Resoluziun

VI. Protocol

46 Cuntegn, investa ed approbaziun

D. Suprastonza communal

47 Repartiziun e delegaziun dallas cumpetenzas

48 Convocaziun e cumpetenzas

49 Deliberaziun dallas fatschentas

50 Cumissiuns specialas

E. President communal

51 Incaricas e cumpetenzas

F. Cussegl da scola

52 Organisaziun

53 Collaboraziun regiunala

54 Direcziun da scola

G. Determinaziuns finalas

55 Determinaziuns finalas

A. Determinaziuns generalas

Art. 1 Camp d'applicaziun

¹Quest regulativ da fatschentas se basa sin la constituziun communal e sin la lescha davart ils dretgs politics e vala per tuttas autoritads e cumissiuns communalas, nun che prescripziuns specialas stipuleschan enzatgei auter.

²Las cumpetenzas dils organs communalas sedrezzan tenor las prescripziuns dalla constituziun communal.

Art. 2 Dretg subsidiar

Aschinavon che quest regulativ cuntegn buca prescripziuns divergentas, valan las disposiziuns dalla lescha cantunala davart il Cussegl grond sco era quellas dalla lescha communal e cantunala davart ils dretgs politics directamein ni conform al senn.

Art. 3 Recusaziun

¹Damondas da recusaziun el senn d'art. 16 dalla constituziun communal vegnan examinadas e decididas all'entschatta dalla tractaziun d'ina fatschenta. Quei succeda en assenza dils pertuccai.

²Persunas ch'adempleschan ina funcziun en representanza ni en incarica dalla vischnaunca, ein buca obligadas da prender stgisa.

Art. 4 Votaziuns

¹Votaziuns succedan per regla cun maun pli, nun ch'ei vegn pretendiu scrutini.

²Ina fatschenta ei acceptada, sch'il diember dallas vuschs affirmativas survarga la mesadad dallas vuschs valeivlas.

³Il president votescha medemamein. Tier egalitad da vuschs dat el la decisiun e quei senza risguardar sia vusch gia dada giu.

Art. 5 Elecziuns

¹Aschinavon ch'ei exista mo ina proposta ni che negin pretenda scrutini, succedan las elecziuns cun maun pli.

²Survarga il diember da candidats buca il diember da posts, sa l'elecziun succeder en globo.

Art. 6 Protocol ed informaziun

¹Davart las tractativas dallas autoritads communalas e dallas cumissiuns eisi da menar protocols separai, che cuntegnan silmeins ils conclus ed ils resultats dallas votaziuns.

²Mintga autoritad e cumissiun dessegna in actuar e meina in protocol.

³La suprastanza communal obtegn mintgamai in exemplar dil protocol.

⁴Tiarzas persunas san, cun excepziun dils protocols dil cussegl da vischnaunca, prender investa els protocols mo lu, sch'ellas san far valer interess fundai. A quei giavisch sa era vegnir satisfatg entras in extract dil protocol. Per regla ein tals extracts da far pér suenter l'approbaziun dil protocol.

B. Radunonzas d'informaziun

Art. 7 Radunonzas d'informaziun

Radunonzas d'orientaziun vegnan convocadas per informar sur da fatschentas da speciala muntada.

Art. 8 Convocaziun

¹Radunonzas d'informaziun vegnan convocadas dalla suprastonza communal ni sin giavisch da silmeins 80 votants. La convocaziun ha da succeder diesch dis avon cun annunziar las tractandas egl organ official da publicaziuns dalla vischnaunca.

²Las radunonzas vegnan presidiadas dil president communal, en cass d'impediment entras siu substitut.

Art. 9 Decisiuns

En mintga radunonza d'informaziun, convocada correctamein, eisi pusseivel d'arranschar votaziuns consultativas. Ei sa vegnir priu posiziun ed arranschau votaziuns mo sur da fatschentas ch'ein tractadas e predeliberadas dalla suprastonza communal.

Art. 10 Votaziuns

Votaziuns consultativas succedan per regla cun maun pli, nun che tschun votants pretendan scrutini.

C. Cussegl da vischnaunca**I. Constituziun****Art. 11 Seduta constitutiva**

¹All'entschatta d'ina perioda d'uffeci seraduna il cussegl da vischnaunca ad ina seduta constitutiva. Quella vegn convocada dil president communal, il qual arva la seduta.

²Il commember dil cussegl da vischnaunca cun l'aulta vegliadetgna e cun il pli liung temps d'uffeci (senior) empeila l'elecziun da dus dumbravuschs, da dus suppleants e dil president dil cussegl da vischnaunca. Silsunter suonda la saramentaziun.

³Sut l'egida dil nieveligiu president suonda l'elecziun dil vicepresident e digl actuar. Igl actuariat sa vegnir surdaus ad in emploiau dall'administraziun communal.

⁴L'elecziun dil president e dil vicepresident succeda entras scrutini.

⁵Las elecziuns per il secund, tierz e quart onn dalla perioda d'uffeci presidescha mintgamai il president dil cussegl da vischnaunca. Quellas elecziuns han liug ella davosa seduta digl onn d'uffeci che scada.

Art. 12 Saramentaziun

¹Sunter l'avertura d'ina nova perioda d'uffeci suonda la saramentaziun. Primarmein vegn il president dil cussegl da vischnaunca saramentaus entras il commember senior.

²Silsunter suonda la saramentaziun ni l'empermischun.

a) dil president communal

b) dils ulteriurs commembers dil cussegl da vischnaunca, dalla suprastonza communal e dils commembers dil cussegl da scola sco era dils commembers dalla cumissiun da gestiun.

³La formulaziun dil sarament secloma: "Vus sco president eligiu dil cussegl da vischnaunca (Vus sco president communal, respectivamein Vus sco commembers eligi dil cussegl da vischnaunca, dalla suprastonza communal ni dil cussegl da scola) engireis avon Diu d'ademplier tut las obligaziuns da Vies uffeci tenor meglier saver e puder."

Il sarament vegn fatgs cun repeter ils plaids "Jeu engirel".

⁴La formulaziun dall'empermischun secloma: "Vus sco president eligiu dil cussegl da vischnaunca (sco commembers eligi dil cussegl da vischnaunca, dalla suprastonza communal ni dil cussegl da scola) empermetteis d'ademplier tut las obligaziuns da Vies uffeci tenor meglier saver e puder." L'empermischun vegn fatga cun repeter ils plaids "Jeu empermettel".

Art. 13 Temps d'uffeci

¹President e vicepresident vegnan eligi per in onn. Ina reelecziun ei pusseivla.

²Dumbravuschs, suppleants ed actuar vegnan eligi per la perioda d'uffeci.

Art. 14 Vicepresident communal e cumissiuns

¹Il cussegl da vischnaunca elegia all'entschatta da mintga perioda d'uffeci il vicepresident communal e las cumissiuns permanentas.

²Alla suprastanza communal cumpeta il dretg da far atgnas propostas.

II. Sedutas**Art. 15 Convocaziun e tractandas**

Il cussegl da vischnaunca vegn convocaus dil president dil cussegl da vischnaunca sin giavisch dalla suprastanza communal aschi savens sco las fatschentas pretendan. Il datum da seduta e las tractandas vegnan fixai dil president dil cussegl da vischnaunca en concordanza cul president communal.

Art. 16 Sedutas extraordinarias

La suprastanza communal ni silmeins tschun cussegliers da vischnaunca san pretender a scret dil president dil cussegl da vischnaunca e cun indicar las tractandas ch'ei vegni convocau ina seduta extraordinaria.

Art. 17 Invitaziun

L'invitaziun allas sedutas succeda a scret ni sin via electronica sil pli tard diesch dis avon, cun aschuntar la gliesta da tractandas ed ils messadis. En cass urgents san ins sviar da quella regla.

Art. 18 Dretg d'informaziun

¹Ils cussegliers han il dretg da survegnir informaziuns el rom da lur lavur parlamentara e cun resalva dil secret d'uffeci.

²Il president communal procura ch'ils cussegliers sappien prender investa dalla documentaziun davart las fatschentas tractandadas silmeins tschun dis avon la seduta tier l'administraziun communal, aschinavon che quels ein buca suttamess al secret d'uffeci.

Art. 19 Participaziun

¹Scadin cusseglier ei obligaus d'assister allas sedutas.

²Il president communal ei medemamein obligaus d'assister allas sedutas ed – aschinavon che quei ei necessari per la tractaziun dallas fatschentas – era ils ulteriurs commembers dalla suprastanza communal.

³Perstgisas motivadas ein da comunicar ad uras alla administraziun communal per mauns dil president dil cussegl da vischnaunca.

Art. 20 Cumpetenzza da decider

Il cussegl da vischnaunca ei cumpetents da decider, sche silmeins nov commembers ein presents.

Art. 21 Predeliberaziun

Il cussegl da vischnaunca sa decider valeivlamein mo davart fatschentas, ch'ei tractandadas e ch'ei vegnidas predeliberadas dalla suprastonza communal e cun propostas corrispudentas.

III. Tractaziuns**Art. 22 Presidi**

¹Il president empeila las deliberaziuns. El procura ch'il regulativ da fatschentas e las isonzas parlamentaras vegnan observadas.

²En cass ch'il president ed il vicepresidente san buc esser presents, elegia il cussegl da vischnaunca in president dil di.

Art. 23 Biro

¹Il president, il vicepresidente ed ils dumbravuschs formeschan il biro dil cussegl e coordineschan il decuors dallas sesidas dil cussegl da vischnaunca. Il president communal ni siu substitut san sin invit assister allas sedutas dil biro dil cussegl cun vusch consultativa.

²Il biro prepara en concordanza cun la suprastonza communal l'elecziun dallas cumissiuns parlamentaras.

Art. 24 Cumissiuns predeliberontas

Per la predeliberaziun da fatschentas da pli gronda muntada sa il cussegl da vischnaunca sez, ni sin giavisch dalla suprastonza communal, eleger ina cumissiun predeliberonta. Quella ei obligada da dar in rapport a scret alla suprastonza communal per mauns dil cussegl da vischnaunca.

Art. 25 Participaziun da personas dil fatg

Per la tractaziun da fatschentas da speciala muntada sa il cussegl da vischnaunca ni la suprastonza communal envidar a sias sedutas personas dil fatg cun vusch consultativa.

Art. 26 Presentaziun dallas posiziuns

¹All'entschatta dalla tractaziun d'ina fatschenta ein las propostas dalla suprastonza communal da comunicar. La presentaziun dalla fatschenta succeda entras in representant dalla suprastonza communal.

²Aschinavon ch'ina fatschenta ei vegnida predeliberada d'ina cumissiun parlamentara, obtegn primarmein il representant da quella cumissiun il plaid.

³Il president communal ed ils ulteriurs commembers dalla suprastonza communal obtegnan il plaid, aschispert ch'els pretendan ei. Pigl ulteriur vegn dau il plaid ella successiun dall'annunzia.

⁴Il plaid vegn daus ordeifer la successiun, sch'in cusseglier pretenda ch'il reglament vegni respectaus ni sch'ei vegn fatg ina proposta tier il regulativ da fatschentas ni sch'el vul rispunder ad ina remarca persunala.

Art. 27 Debatta d'entrada

¹All'entschatta dalla deliberaziun ha per regla liug ina debatta d'entrada.

²L'entrada ei obligatoria tier iniziativa, tier il preventiv, tier il quen annual e tier il rapport da gestiun, sco era tier ulteriuras fatschentas, che la constituziun prescriba da tractar. Enstagl d'ina debatta d'entrada sa vegnir arranschau ina discussiun generala.

³Sch'ei vegn fatg duront la debatta d'entrada ina proposta da buca entrar ni da renviar la fatschenta, ha la discussiun da serestrenscher a quella proposta ed igl ei da votar surlunder avon che cuntinuar cun la discussiun generala.

Art. 28 Deliberaziun en detagl

¹Sch'ei vegn concludiu d'entrar ella materia, suonda la deliberaziun en detagl.

²Il plaid vegn daus ella successiun sco el vegn dumandaus. Tier il medem punct astga in cusseglier prender sil pli bia treis gadas il plaid. Ina excepziun ei mo pusseivla per ils commembers da suprastonza e per ils plidaders da cumissiuns predeliberontas.

³Sch'il president dil cussegl vul separticipar alla discussiun, surdat el il presidi per la tractaziun dalla fatschenta pertuccada al vicepresident.

⁴La discussiun ha da serestrenscher alla caussa en tractaziun. Il president ha d'intervegnir, sche quella prescripziun vegn buca observada.

⁵Il cussegl da vischnaunca sa restrenscher il temps da plidar.

Art. 29 Plaid final

¹Sche la discussiun ei exausta, ha il representant dalla suprastonza communal il dretg al plaid final.

²Ei la fatschenta vegnida deliberada d'ina cumissiun parlamentara, ha il representant dalla cumissiun ni sche la cumissiun ei buca unanima, primarmein il representant dalla minoritad e silsunter il representant dalla majoritad sco era il representant dalla suprastonza communal il dretg al plaid final.

Art. 30 Objectividad

¹La discussiun ha da setener allas reglas dalla creanza. Remarcas che violeschan la honur astgan buca vegnir fatgas. Cuntravenziuns da quei principi ston immediatamein vegnir admonidas dil president. En cass grevionts eis el competents da prender il plaid ad in votant. Oppona quel encunter quella mesira, decida il cussegl.

²En cass grevionts sa il cussegl da vischnaunca sclauder in cusseglier dalla seduta.

Art. 31 Propostas davart igl uorden

Tier propostas davart igl uorden vegn il plaid buca surdaus per la discussiun, mobein ei vegn votau immediatamein. Sco proposta davart igl uorden valan propostas che serefereschan sin l'interrupziun dalla seduta, la refiersa dalla fatschenta, la fuorma dalla deliberaziun ni l'applicaziun digl uorden da fatschenta insumma.

Art. 32 Proposta da serrar la discussiun

¹Vegn ei fatg ina proposta da serrar la discussiun, eis ei da votar immediatamein sur da quella. Ina tala proposta drova per l'approbaziun duas tiarzas dallas vuschs valeivlas.

²Vegn la proposta per serrar la discussiun approbada, obtegnan mo aunc ils votants gia annunziai, il representant dalla suprastonza communal ed eventuels referents dalla cumissiun la pusseivladad da s'exprimer.

Art. 33 Propostas da revegnir

¹Alla fin dalla deliberaziun d'ina fatschenta dat il president la pussevividad da revegnir a singuls artechels, aschinavon che la pluralità dils presents va d'accord.

²Il parsura sa stuschar la tractaziun d'ina fatschenta, alla quala il cussegl vul revegnir, sin la fin dalla seduta.

Art. 34 Reponderaziun

¹Entochen la fin da scadina seduta san duas tiarzas dils presents pretender, ch'ina fatschenta già liquidada vegni reponderada.

²Il cussegl concluda suenter ina cuorta motivaziun dil proponent.

Art. 35 Secunda lecziun

Il cussegl sa, cun excepziun dil quen annual e dil rapport da gestiun, concluder ina secunda lecziun.

Art. 36 Access public allas deliberaziuns

¹Las deliberaziuns dil cussegl da vischnaunca ein publicas. Las tractandas ein da publicar egl organ official da publicaziun e sin via electronica.

²La suprastanza communal informescha la publicità davart il decuors dallas fatschentas.

³Excepziunalmein sa il cussegl da vischnaunca concluder da deliberar las fatschentas a portas serradas. Davart quei fatg vegn decidu per scrutini.

IV. Votaziuns**Art. 37 Disposiziuns**

¹Avon mintga votaziun prelegia il president la formulaziun exacta dallas propostas. El fixescha la successiun da votar sur las propostas.

²Objecziuns encunter quellas disposiziuns liquidescha il cussegl ladinamein.

³Il president sa ordinar che las propostas vegnien suttamessas a scret.

Art. 38 Successiun dallas propostas

¹Las propostas vegnan messas sequentamein en votaziun:

- a) midadas subordinadas;
- b) propostas da midadas;
- c) propostas principalas.

²Schaian pli che duas propostas principalas avon maun, vegn ei votau il medem mument surlunder. Mintga cusseglier astga denton votar mo per ina. Obtegn negina proposta la maiorità dallas vuschs, croda la proposta cun las pli paucas vuschs. Silsuenter vegn la medema procedura duvrada per las propostas restontas entochen ch'ina proposta obtegn la maiorità.

Art. 39 Propostas cumbinadas

Tier propostas cumbinadas vegn votau separadamein sur dallas singulas parts. Sa ina damonda da votaziun vegnir separada, ha quei da succeder sch'in cusseglier pretenda.

V. Intervenziuns parlamentaras

Art. 40 Principi

¹Scadin cusseglier ha il dretg d'inoltrar a scret moziuns, postulats ed interpellaziuns al president dil cussegl da vischnaunca. En fatgs da pli pintga muntada san damondas vegnir fatgas directamein alla suprastonza communalala.

²Moziuns e postulats declarai relevants, denton aunc buca exequi, ein da menziunar el rapport da gestiun.

Art. 41 Moziun

¹Ina moziun ei ina proposta ch'oblighescha la suprastonza communalala da suttametter al cussegl da vischnaunca in project ni da far ina proposta per relaschar, midar ni cassar ina lescha, ina ordinaziun ni in conclus dil cussegl da vischnaunca.

²Il president communichescha la moziun al cussegl da vischnaunca. Ella vegn tractada dil cussegl da vischnaunca enteifer miez onn dapi ch'ella ei vegnida inoltrada. Sin proposta dalla suprastonza communalala sa il cussegl da vischnaunca prolungir quei termin.

³La moziun ei da motivar oralmein entras il moziunari e da rispunder entras il representant dalla suprastonza communalala. Ei suonda la discussiun generala. Silsunter decida il cussegl, schebein el vul acceptar la moziun ni buc. Vegn ella acceptada, ha la suprastonza communalala da corrispunder ad ella enteifer in onn. Il cussegl da vischnaunca sa prolungir quei termin sin fundament d'in rapport dalla suprastonza communalala.

Art. 42 Postulat

¹Il postulat ei ina proposta nunligionta dil cussegl da vischnaunca, che propona alla suprastonza communalala d'intervegnir sigl intschess dalla legislaziun ni dall'administraziun.

²Il president communichescha il postulat ella medema seduta al cussegl da vischnaunca. El vegn tractaus dil cussegl da vischnaunca enteifer treis meins dapi ch'el ei vegnius inoltraus. Sin proposta dalla suprastonza communalala sa il cussegl da vischnaunca prolungir quei termin.

³Il postulat ei da motivar oralmein entras il postulant e da rispunder entras il representant dalla suprastonza communalala. Ei suonda la discussiun generala. Silsunter decida il cussegl, schebein el vul acceptar il postulat ni buc.

⁴Accepta il cussegl da vischnaunca il postulat, ha la suprastonza communalala da dar rapport enteifer in onn.

Art. 43 Interpellaziun

¹Cun ina interpellaziun sa in cusseglier pretender sclariment dalla suprastonza communalala sur da fatgs ch'ei tenor prescripziuns vertentas buca da tener tschelau.

²Il president communichescha l'interpellaziun al cussegl da vischnaunca. Ella vegn tractada immediatamein ni sil pli tard enteifer treis meins. Sin proposta dalla suprastonza communalala sa il cussegl da vischnaunca prolungir quei termin.

³L'interpellaziun vegn motivada oralmein e rispundida d'in representant dalla suprastonza communalala. Igl interpellant sa declarar, schebein el ei cuntents cun la risposta ni buc. Ina discussiun ha mo liug, sch'ella vegn decidida dil cussegl da vischnaunca.

Art. 44 Ura da damondas

¹A caschun da mintga seduta sa vegnir arranschau in'ura da damondas.

²Duront quell'ura san commembers dil cussegl da vischnaunca far damondas che pertuccan in sectur special e selaian rispunder a moda semplla. Talas vegnan protocoladas.

³Damondas da pli gronda impurtonza ein d'inoltrar a scret e sil pli tard treis dis avon la seduta alla suprastonza communalala.

⁴Las damondas vegnan rispundidas oralmein. Igl interpellant ha la pusseivladad da far ina damonda supplementara. Ina discussiun sa haver liug.

Art. 45 Resoluziun

¹En concordanza cun la suprastanza communal sa il cussegl da vischnaunca prender resoluziun enviens instanzas federalas, cantunalas ed autras instituziuns, pertuccont fatschentas d'interess impurtonts dalla vischnaunca.

²Propostas per resoluziuns ein d'inoltrar a scret al president dil cussegl da vischnaunca.

VI. Protocol**Art. 46 Cuntegn, investa ed approvaziun**

¹Il protocol ha da cuntener las fatschentas, propostas ed ils conclus, sco era igl essenzial dalla discussiun. Tier votaziuns ed elecziuns ei il diember dallas vuschs dad indicar.

²Declaraziuns per mauns dil protocol san vegnir dadas mo ella seduta ch'il conclus vegn prius. Ellas ston vegnir formuladas a scret.

³Il protocol vegn tarmess als cussegliers ed approbaus ella proxima seduta. Propostas per midadas ston succeder a scret.

⁴Scadin vischin ha il dretg da prender investa els protocols dil cussegl da vischnaunca.

D. Suprastanza communal**Art. 47 Repartiziun e delegaziun dallas cumpetenzas**

¹La suprastanza communal reparta mintgamai all'entschatta d'ina perioda d'uffeci ils departaments e las spartas administrativas sin ils singuls commembers da suprastanza e regla la substituziun.

²Ella sa delegar cumpetenzas finansialas, persunalas ed auters fatgs da tempra operativa alla direenziun communal.

³Quella ordinaziun vegn suttamessa al cussegl da vischnaunca per enconuschientscha.

Art. 48 Convocaziun e cumpetenzas

¹La suprastanza communal vegn convocada dil president communal aschi savens che las fatschentas pretendan quei, ni sin giavisch da silmeins treis commembers dalla suprastanza.

²All'invitaziun duei vegnir aschuntau la gliesta da tractandas. Ils acts necessaris stattan a disposiziun per investa.

Art. 49 Deliberaziun dallas fatschentas

¹Mintga commember dalla suprastanza examinescha e presenta las fatschentas da siu departament per mauns dalla suprastanza communal.

²Fatschentas d'impurtonza vegnan preparadas en stretga collaboraziun cun il president communal.

³Il cau dil departament rapporta sur d'eveniments specials da siu departament al president communal e fa propostas leutier.

Art. 50 Cumissiuns specialas

¹La suprastanza communal sa eleger cumissiuns specialas per preparar fatschentas impurtontas.

²Ella circumscriva l'incarica, fixescha il diember da commembers ed elegia la cumissiun.

E. President communal

Art. 51 Incaricas e cumpetenzas

¹Il president communal representa la vischnaunca anoviars ed ademplescha tuttas incaricas surdadas ad el tenor la constituziun communal e la legislaziun cantunala e federala.

²Ad el cumpeta la surveglanza suprema dall'entira administraziun communal sco era dils departaments.

³En cass urgents relai el decrets provisoris cun rapportar immediatamein alla suprastanza communal.

⁴El ei responsabels per ina buna informaziun dallas autoritads communalas e dalla populaziun.

F. Cussegl da scola

Art. 52 Organisaziun

Per l'organisaziun dil cussegl da scola vala quest regulativ, risguardond art. 49 dalla constituziun communal.

Art. 53 Collaboraziun regionala

¹Conform ad art. 50 dalla constituziun communal obtegn la vischnaunca da Medel/Lucmagn il dretg ad in commember supplementar el cussegl da scola. Quel vegn designaus dalla vischnaunca da Medel/Lucmagn.

²Il cussegl da scola vegn incaricau da tschercar collaboraziuns regionalas sil sector dil scolaesser e da promover participaziuns a consorzis da scola.

Art. 54 Direcziun da scola

El rom da sias incaricas sa il cussegl da scola delegar funcziuns e cumpetenzas ad ina direcziun da scola. Quella secumpona dil president dil cussegl da scola, dil commember dalla suprastanza, incumbensaus cun il scolaesser e dil meinascola. Persunas cun incaricas specialas san vegnir envidadas allas sedutas cun vusch consultativa.

G. Determinaziuns finalas

Art. 55 Determinaziuns finalas

¹La revisiun parziala dils 14 da zercladur 2013 (cun excepziun digl art. 53) passa en vigur igl emprem d'uoost 2013. La revisiun parziala dils 21 da fevrer 2014 passa retroactivamein cun igl emprem da schaner 2014 en vigur.

²Cun l'entrada en vigur da quest regulativ ein tuttas prescripziuns che stattan en cuntradiziun cun las novas determinaziuns cassadas.

Acceptau dil cussegl da vischnaunca ils 14 da zercladur 2013 ed ils 21 da fevrer 2014.

Il president communal:
Francestg Cajacob

Il canzlist communal:
Andri Hendry